



Atassut sinnerlugu Inatsisartunut ilaasortat  
Knud Kristiansen aamma Siverth K. Heilmann

## **Timmisartuussineq pillugu kiffartuunneqarnissamut isumaqatigiissuteqarnissaq pillugu § 37 naapertorlugu apeqqummut nr. 2011-138-imut akissut**

18. juli 2011  
Sagsnr. 2011-052455  
Dok. Nr. 681173

Apeqqtissinnut tullerriaarlugit akiniakkannut qujanarsuaq:

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

### **Nunap immikkoortuinut inukitsunut aammalu naammattunik ilaasusaqarfiunngitsunut timmisartuussisarnissaq pillugu sullissinissamik isumaqatigiissuteqarnissaq anguniarlugu isumaqatigiinniartoqarsimava?**

Suliariumannittussarsiuussinernik ingerlatsisoqanngilaq. Maannakkut kiffartuunneqarnissamut isumaqatigiissutaasut 2010-p naanerani atorunnaartut piumasaqaatigineqartut taakkorpiaat piumasaqaatigalugit 2012-ip naanissaanut sivitsorneqarput. Tamatuma kinguneraa kiffartuunneqarnissamut isumaqatigiissummut akiliutit maannalu kiffartuussinerup qaffasissusia 2012-ip naanissaata tungaanut allannguuteqanngitsumik ingerlaannassasoq.

Suliariumannittussarsiuussinissap kinguartinneqarneranut pissutaavoq Assartuussineq pillugu Isumalioqatigiissitap isumaliutissiissutaata utaqqineqarnissaa naapertuunnerpaasorineqarsimammat taamaalilluni isumaliutissiissummit allannguutissatut siunnersuutaasinnaasut kiffartuunneqarnissamut isumaqatigiissutinut nutaanut ilanngunneqarsinnaangorlugit.

### **Taamatut pisoqarsimangippat qaqugu tamanna ingerlanniarneqarpa?**

2012-imi suliariumannittussarsiuussisoqarnissaa naatsorsuutigineqarpoq, kiffartuunneqarnissamut isumaqatigiissutit nutaat 1. januar 2013-imi atuutilersinnaangorlugit.

### **Neqeroorusiassap qanoq imaqarnissaa qaqugu isummerfigineqassava?**

Ineqarnermut, Attaveqarnermut Angallanermullu Naalakkersuisoqarfiup isumaqatigiinniarnissaq 2011-p affaata kingulliup ingerlanerani aaqqissuunniarpaa. Tamatumunnga atatillugu paasineqassaaq neqeroortitsinissamut najoqqutassat, suliariumannittussarsiuussinermut il.il. atatillugu suliaq qanoq annertutigisoq Namminersorlutik Oqartussat isumagissaneraat suliasarlu sorleq Namminersorlutik Oqartussat ikiorteqarfigissaneraat.

### **Isumaqatigiissutit ukiuni qassini atortuujumaarnissaat pillugu sivilissusiliisoqareerpa?**

Naamik kiffartuunneqarnissamut isumaqatigiissutissanut suli sivilissusiliisoqanngilaq, tamanna neqeroortitsinissamut najoqqutassat suliarineqarnerannut atatillugu pissaaq. Kiffartuunneqarnissamut isumaqatigiissutit sivilissusissaat pillugu isumaliutini

isumaqatigiissutitut sivikinnerusumik sivilunerusumillu atuuttussat ilanngunneqassapput.

Piffissami sivikinnerusumi kiffartuunneqarnissamat isumaqatigiissuteqarnissaq suliamik ingerlasserusussinnaasunut isumaqatigiissuteqarnissaq pilerinannginnerusinnaavoq - kiffartuunneqarnissamat isumaqatigiissummut akiliutit ukiumut assigiiginnarnissaat tunngavigigutsigu. Tamanna sulisussaqaarnissamat ilaatigullu neqeroortitsinissamat najoqqutassat, ilaatigullu – suliarinnittussap suliariumannittussarsiuussinermi suliassaq pissarsiarippagu – suliassap isumagineqarnissaanut timmisartunik/qulimiguulinnik, sulisussanik il.il. pissarsinissaanut tunngavoq. Taamaattumik ataatsimut isigalugu ukiumi ataatsimi kiffartuussinissamat isumaqatigiissutip isumaginissaa suliamik isumaginnittuusumut ukiuni arlalinni kiffartuussinissamat isumaqatigiissuteqarnertulli pilersitsinikkut aningaasartuuteqarfiussaaq.

Tamatuma saniatigut suliariumannittussarsiuussinerni aamma Namminersorlutik Oqartussat sulisussaqaqtariaqarput taamaattumillu sivikinnerusumik isumaqatigiissuteqarnissaq naapertuunnaviarani tamatuma amerlanerusunik suliariumannittussarsiuussisarnissaq nassatarissamagu.

Paarlattuanik piffissamat sivilunerusumut isumaqatigiissuteqarnikkut timmisartuussinerup naleqqussarneqartarnissaa ajornakusoornerulersinneqarsinnaavoq, tassami kiffartuussinerup qaffasissusia, akiliutit il.il. kiffartuussinissamat isumaqatigiissummi aalajangersarneqartussaammata. Taamaalilluni kiffartuussinissamat isumaqatigiissuteqarnikkut Namminersorlutik Oqartussat isorliunerusuni timmisartuussinerit allanngortinneqarnissaannut periarfissaat killilersorneqarsinnaapput. Taamaattorli kiffartuussinissamat isumaqatigiissutit eqaatsumik iluseqartinneqarsinnaapput, taamaalilluni sivilunerusumik isumaqatigiissutit aamma suliamik isumaginnittuusut peqatigalugit piviusut pillugit isumaqatigiinniartilluta pingaarutilittut uuttuutaasinnaallutik.

### **Nunap immikkoortui suut imaluunniit illoqarfiit suut isumaqatigiissummi ilatinneqarnissaat ilimagineqarpa?**

Sumiiffiit ullumikkut kiffartuussinissamat isumaqatigiissutitut ilaatinneqartut aamma siunissami kiffartuussinissamat isumaqatigiissutitut ilaatinneqarnissaat naatsorsuutigineqarpoq.

### **Qaanaap eqqaata Tunullu sullissinissamik isumaqatigiissusiuunneqarnissaat aamma ilaatinneqarpa?**

Ullumikkut Qaanaap eqqaani qulimiguulinnik timmisartuussineq Avannaanilu (Upernaviup Qaanaallu akornanni) suluusalinnik timmisartuussineq pillugu kiffartuussinissamat isumaqatigiissuteqarpoq, taamatullu aamma Tunumi Tasiilap Illoqqortoormiullu eqqaanni qulimiguulimmik, kiisalu Reykjavikip, Kulusuup Nerlerillu Inaata akornanni suluusalinnik timmisartuussinissaq pillugu sullinneqarnissamik isumaqatigiissuteqarluni. Sumiiffiit taakku siunissami kiffartuunneqarnissamik isumaqatigiissutitut ilaatinneqannginnissaat pilersaarutaanngilaq.

Neriuppunga akissutit qulaaniittut naammagigisi.

Inussiarnersumik inuulluaqqusillunga

Jens B. Frederiksen